



Fasnacht 2016

Русские идут

Vo Moskau waiht e yuserne Wind

In Russland gits sit duusig alte Johre
Schneeschtürm, Froscht und gruusig kalti Ohre.
Dr Zar und Winter pagge s Volgg am Kraage
Es schneit so viil wie diggi Wolgge draage.
Wenn d Lüt in Armuet und im Schnee versingge
Dien d Zare d Stüre und der Tee verdringge.
Dr Niggi II ghört zu de gliiche Gleezi:
Als letschte Zar wie sini riiche Speezi
Macht är kei Wank, het bald dr Thron verlore,
Als Erb wird neu d Sowjetunion gebore.
Die Wält isch besser nit als das alte Riich
Im Kärn blibt d Herrschaft und s Verwalte gliich.
Grad meint me s foht die iisig Zyt a daue,
D Mensche glaube dass me sich ka draue,

Macht ein wo Wodka dringgt statt ä Glas Moscht,
Dr Jelzin nämlich, Schluss mit dem Glasnoscht.

Dr Putin kunnt: er sig dr Retter halt
Derbi wird s wider Winter, s Wätter kalt.

Dr Putin ist dr typisch Zare-Sohn,
Als Kreml-Chef miteme Staare-Lohn,
Hoch zue Ross hoggt är mit bluttem Buuse,
Es stäche sini Musggel-Pflutten uuse,
Är rittet schiinbar ufem bruune Bär,
Und meint villicht dass das zum stuune wär.

Er spilt dr Bäretöter, Dracherytter -
Me frogt sich: machen ächtscht so Sache gschiider?

Wie anderi jagt är sicher au so Ente
Als miech ihn das e mächtige, potänte
Chef wenn är eso in Himmel schiesst,
Wo mängem eifach nur dr Pimmel spriesst.

Aber wehe däm wo s öbbe wooge duet
Z frooge, sofort gits us Frooge Bluet.

Mit Demokrate, liberale Geischer,
Zwiifler, spilt er schnäll brutal dr Meischer
Und s Internet isch drum mit Trolle voll,
Au die erledige d Kontrolle toll.

Mit Knascht und Buesse goht der Laade aabe
Sött öbber welle ihm am Waade schaabe.

Wenn trotzdem no si Thron ins wangge kunnt,
Und s lauft nümme alles mit de Bangge rund,
Denn isch die beschte Hilf e Find vo usse.

Us Moskau wäit dr iisig Wind so Russe
Uf d Krim, als grieni Männli still und stumm.

De Lüt dört dreie si dr Wille umm:
Hei nach Russland isch d Devise do.

Au d Ukraine spürt die Brise ko:
D Armee mit Panzer, Massge (schwarze), Gwehr
Reist in d Ferie ans Schwarze Meer.

Wenn sich dr Putin z Moskau pluuderet
Denn spürt mes, wies bi uns au tschuuderet.

Dä Wind wo vo de Autokraate wäit,
Und z Pole, z Ungarn sini Saate säit,
Treit Frücht bi uns mr wärdes do au gseh,
Bewiis isch s Putin Bild vor SVP.

Dr Köppel gseht in ihm e grosse Ma.
Autokrat? Isch nüt zum stosse dra.

Umgekehrt: s isch dr Glanz vo toller Pracht,
Wo d Macht vo ihm für viil no voller macht.

Mit blutter Bruscht und ufem hoche Ross
Das gfallt em Herrscher-noche Tross
Kei Widerred, kei demokratisch Gschwätz
Kei Usglich, Aschtand, denn so Züg isch lätz

Es macht dä iisig Wind vom Russe Zar
Bi uns bald alles dinn und dusse starr.

Nur s Klima stigt, dä liederligi Kärli
Es hilft nit, weme glaubt das sig e Märli;
Do sötts de meischte in de Ohre glöggele:
Wo Macht nit hilft - mien Diggdadore bröggele

**Mechtsch aaf Pfyffe oder Drummle, bisch mindischdens
7 Johr alt und hesch Luscht zem sälber Fasnacht mache?
So mäld dy lieber hit als morn bi unserer Obfrau vo dr
Junge Garde, dr Salome Hofer, salome.hofer@bluewin.ch
oder kumm diräggt ans Yyschribe vom 22. Februar 2016,
18.00 bis 20.00 zu uns in Käller an dr Drohtzugstrooss 69.**

D Ladäärne-Uusstellig uff em Minschterplatz und
d Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt ka
men au alli Zeedel und Schnitzelbängg, d Blaggedde
und dr Rädäbäng kaufe.

Am Fritig und Samschtig, 19. und 20. Februar 2016 isch
Noochwuggswärbig vo dr 1. Lektion im Zält uff em Barfi.

D'Zeedelläsete isch am Sunntig noo dr Fasnacht 2016 am 21. Hoornig
vom Fimfi bis am Siibeni zoobe, in dr Baseldytschi Bihni (im Lohnhof).
Dr Ytritt isch vergäabe. D Foyer-Bar isch vom Vieri ewägg offe.
